

Жуғрофияни ўқимаган болакайнинг маҳорати



14:00 / 27.12.2022 2811

Бразилиялик ёзувчи Пауло Коэло қуйидаги қисқа ҳикояни шундай баён қилади:

«Бир ота газета ўқишга уринарди. Лекин кичик ўғли унга халақит бериб, газета ўқитмас эди. Ўғлининг тўполонларидан чарчаган ота қўлидаги газетанинг бир четидан йиртди-да, ўша йиртилган парчани яна бир неча бўлақларга бўлиб, боласига узатди. Бўлақларга бўлинган парчада дунё харитаси бор эди. Ўғлидан шу харитани яна қайта ўз ўрнига қўйиб чиқишини талаб қилди. Ўзи эса яна газета ўқишга киришиб кетди. Хаёлида «Болам кун бўйи шу иш билан машғул бўлади, мени безовта қилмайди» деб ўйлади. Аммо отанинг газета ўқиши узоққа чўзилмади. Чунки, бола ўн беш дақиқа ўтар-ўтмас, парчаланган харитани ўз ўрнига жамлаб, яна отасини безовта қила бошлади. Ота ўғлини қилган ишидан лол бўлиб, ундан сўради: «Онанг сенга жуғрофияни ўргатганми, болам?», деб сўради.

Бола: «Йўқ, отажон, лекин қоғознинг орқа томонида инсон сурати бор экан. Инсон суратини жой-жойига келтирганимда, дунё харитаси ҳам жойига келди» деди.

Ушбу ҳикоядаги болакайнинг жавоби жуда ҳам оддий, содда кўринар, лекин анча чуқур маънога эга эди. Дарҳақиқат, инсонийлик деган бино чиройли суратда қад ростласа, дунё, жаҳон, олам деб аталган бино ҳам гўзал ҳолатга келади.

Расмга эътибор беринг:

- Мақсад битта — «Девор қуриш»;
- Бажариладиган вазифа ҳам битта — «Қурилиш»;
- Керакли маҳсулотлар ва харажатлар ҳам бир хил;
- Ишчи кучининг сарфи ҳам бир хил.

У ҳолда нега деворлар икки хил? Чунки, деворни чиройли қилиш учун ўша деворни қурувчи устанинг ўзи моҳир бўлиши керак. Яъни, девордан олдин уни қурувчи устанинг ўзи касбининг етук мутахассисиси бўлиши муҳим. Шунинг учун ҳам ҳар биримиз ўзимиз хизмат қилаётган соҳанинг моҳир билимдони бўлишимиз лозим.

Осим ибн Кулайб отасидан ривоят қилади, отаси айтади:

«Мен отам билан Набий соллаллоҳу алайҳи васаллам иштирок этган жанозада қатнашдим. У пайтларда мен оқ-қорани танийдиган бола эдим. Шунда Расулulloҳ соллаллоҳу алайҳи васаллам: «Аллоҳ таоло ўз ишини чиройли, пухта қиладиган кишини яхши кўради» дедилар».

Табароний ривояти.

Бу ҳадиснинг саҳиҳлиги борасида уламолар ихтилоф қилганлар. Баъзи аҳли имлар уни ҳасан деган бўлсалар, баъзилари заиф деганлар. Аммо ҳадиснинг маъноси саҳиҳдир. Чунки бу ҳадиснинг маъноси саҳиҳлигига қуйидаги ҳадис далил бўлади.

Шадод ибн Авс розияллоҳу анҳудан ривоят қилинади.

«Икки нарсани Расулulloҳ соллаллоҳу алайҳи васалламдан ёдлаб олдим, у зот:

«Албатта, Аллоҳ ҳар бир нарсага яхшиликни ёзгандир. Агар қатл қилсангиз, қатлни яхшилаб қилинг! Агар сўйсангиз, сўйишни яхшилаб адо этинг! Ҳар бирингиз пичоғини ўткир қилсин ва сўйиладиганни роҳатлантисин!» дедилар».

Бешовлари ривоят қилган.

Ушбу ҳадиси шариф Ислom дини яхшилик дини эканининг улкан шиорларидан биридир. Ислom ҳар бир нарсада, ҳар бир ишда, ҳар бир тасарруфда, ҳар бир ҳаракатда яхшилик бўлишининг тарафдоридир.

Бировни қатл этиш энг ночорликдан қилинадиган иш. Ҳаддан ташқари катта гуноҳ содир этган, одамлик доирасидан чиқиб кетганларгина қатл жазосига ҳукм қилинадилар. Ундоқ кишиларга бошқа тузум ва низомларда ҳар қанча қўпол муомалани, эсидан чиқмайдига қилиб «кунини кўрсатиб қўйишни» раво кўрилиши мумкин. Аммо, Исломда бунга йўл йўқ. Ноиложликдан ўлимга ҳукм бўлдими, энди, энг осон йўл билан ўлдириш керак.

Ҳайвон сўйишда ҳам шу гап. Бошқалар турли-туман услубларни қўллайдилар. Энг кўп эътибор берадиган нарсалари сўювчига осонлик яратиш бўлиши мумкин.

Аммо Ислом сўйиладиган ҳайвонни роҳат қилдириб сўйишни талаб қилади. Шунинг учун ҳам Пайғамбар соллаллоҳу алайҳи васаллам:

«Агар сўйсангиз, сўйишни яхшилаб адо этинг! Ҳар бирингиз пичоғини ўткир қилсин ва сўйиладиганни роҳатлантисин!» дедилар».

Ҳаттоки, пичоқни ҳайвоннинг олдида қайрашга рухсат берилмайди. Пайғамбар соллаллоҳу алайҳи васаллам ҳайвонни ётқизиб қўйиб пичоғини қайраётган одамга:

«Буни ётқизишингдан олдин қайрасанг бўлмасмиди!» деганлар.

Қаранг, динимизда барча иш, ҳатто ҳайвон сўйиш ҳам пухта чиройли қилиб бажарилиши буюрилган. Шунинг учун ҳар биримиз ўз касбимизнинг билимдони бўлиб, хизмат қилсак, ишимизни қўл учида эмас. Балки пухта бадаришга уринсак, аввало Аллоҳ таолонинг муҳаббатига сазовор бўламиз, Унинг амрини бажо келтирган бўламиз, қолверса, Аллоҳнинг бандалари хизматимиздан мамнун бўладилар, ранжимайдилар.

Аллоҳ таоло барчамизни ўз ишини пухта бажарадиган бандалардан қилсин.

Фойдаланилган адабиётлар:

«Ҳадис ва ҳаёт» китоби

Қуръон ва суннат фанлари бўйича тадқиқотчи Али инб Ноиф аш-Шаҳуднинг «Аллоҳ таоло яхши кўрадиган зотлар» рисоласи

islom.uz

dorar.net

sharh-alhadith.com

Таржимон: Нозимжон Ҳошимжон
Муҳаррир: Хуршид Маъруф